

240.193

39

312

儂

居

集

地

233.87

39

仙居集卷四目錄

文外編六

碑誌十六首

宋 朝請大夫吳公并碩人姚氏墓誌銘

樓鑰 攻媿集

元 鞠隱先生墓碣

徐一夔

始豐稿

故天台朱府君霞塢阡表 宋濂 宋學士全集下同

天台顧氏先德碑 宋濂

故仙居陳府君墓誌銘 宋濂 宋文憲公全集三十七

磴礧子碣 宋濂

仙居張處士墓誌銘 方孝孺 遜志齋集

岫雲先生墓誌銘 王叔英 靜學文集下同

光緒僊居集卷之四 目錄

趙處士墓誌銘 王叔英

贈承直郎襄府審理張公墓碣銘 金幼孜 友清公集

明處士應公暨配貞節陳氏墓碑 呂柟 涇野文集

應方伯良墓誌 鄒守益 鄭志


贈中憲大夫南京都察院右僉都御史率菴吳公墓表

徐階 世經堂集

吳參議廉墓表 吳遵 鄭志

貞節郭安人張氏墓誌銘 金賁亨 一所集

國朝 吳巨喬先生墓誌銘 姜敏修



仙居集卷之四

文外編六

碑誌

宋

朝請大夫吳公弁碩人姚氏墓誌銘

樓 鑰

仙居吳氏自龍圖閣直學士給事中康肅公以儒術發身人從出藩爲時名臣長子興化使君首躡世科兄弟簪笏蟬聯多至郡守族黨中登貢籍擢科級者相望遂爲巨族鑰淳熙五年由敕令所刪定官贅倖丹丘始拜康肅於湖山堂時居邑之石井旣掛衣冠夫婦偕踰七十子孫誥誥坐享耆福谿山勝絕來者如游崑閩鑰一見尋知獎良厚因得與諸子游今識其家四世

光緒僊居集

卷之四

文外編

碑誌

二

矣興化明鏡奇龐謂必可接武夷路不幸嬰末疾止於中壽次子鄞丞壻四明史氏鑰以第三子娶其女遂爲姻家今知吉州公比爲大理寺主簿同朝見過泣而言曰先君抱負不凡先妣婦德素著而葬之日兄弟尚未立未有銘文以傳後介弟旣亡繫誰之責援親契以請余感念疇昔爲之永慨乃掇括蒼貳車郭君晞宗所爲行狀及興化自爲姚碩人行述大概併爲之銘君諱津字仲登世爲台之仙居人曾祖允昭故封武略大夫祖師錫故任右承議郎累贈光祿大夫考芾康肅公也官通奉大夫累贈少師妣郭氏贈魯國夫人君幼嗜學強記博通羣書尤熟文選或覆誦終帙年十有五以詞賦魁鄉校嘗從秘書郎王

公銜頌臺主簿胡公權殿中季公棠游三人皆名儒每器重之  
康肅爲御史以郊恩任將仕郎爲銓闈第二人授右迪功郎監  
潭州南嶽廟侍旁益肆於學連薦漕臺登乾道五年進士乙科  
充兩浙東路安撫司幹辦公事改宣教郎知處州麗水縣監行  
在都進奏院爲親求補外添差通判紹興府淳熙九年賜五品  
服十年繼丁內外艱執喪甚哀倚廬增慕靈芝產於楣人嗟其  
孝感紀以詩文服除權發遣江陰軍未上改主管建甯府武夷  
山冲佑觀尋知廣德軍以足疾丐歸改興化軍慶元二年屬疾  
八月四日終於家享年六十有四累官至朝請大夫娶姚氏封  
安人先公六年卒葬之地曰西隩去先墓百步累贈碩人男四

光緒僊居集

卷之四

文外編

碑誌

二

人機朝請郎知吉州軍州事樸故通直郎知慶元府鄞縣丞栻  
迪功郎福州福清縣主簿標迪功郎衢州開化縣尉兼主簿女  
一人適進士姚棟孫男四人燁煜煒灼孫女九人長適承奉郎  
監西京中嶽廟樓治次適從事郎新贛州司戶參軍葉言次適  
將仕郎廬樵次適承信郎新差都大提點坑冶司監轄銅錢金  
銀場顧士龍餘在室曾孫男一人諸孤以十二月辛酉葬公於  
郭坦山東隩之原遷碩人之柩祔公志趣高邁不溺於膏粱之  
習種學績文與寒畯爭馳人在親側宦學增益小試於外動有  
可稱初入帥幕丞相蔣公太師史公爲帥屬以文詞以遠器期  
之丞相葛公樞使黃公爲僚相好號一時幕府之盛麗水試邑

恪守家範夙興冠帶視事決訟如流庭無留牘嚴於治盜民以  
奠居邑社稷壇壝圯壞學宮尤不葺公謂非所以安士訓民也  
乃築三壇於學之東偏又徹學而新之歲祀月書如儀士民俱  
勤焉及官奏邸同知樞密院事謝公時在諫垣舉公自代有曰  
治邑有聲立朝無玷方嚮於用懷親求歸朝士歎其高致賦詩  
宴餞歸娛膝下久之乃到官參政李忠文公多以郡事委之裁  
決歲饑流殍盈路公請發圭租倡率勸分人遂樂從待制朱文  
公爲提舉官任以荒政躬走阡陌如懷隱憂有所措畫俱從其  
言以文學淵源政事詳練薦之廣德久旱種不入土粟價翔躡  
公齋禱祠山隨車沛然時米車輻湊官兵得空券累月悉以給

光緒僊居集

卷之四

文外編

碑誌

三

之積訟不決而兩獄隘陋卑溼公曰不葺不決疫將興矣先呼  
囚徒稽觀察辭隨處以法輕繫以片言折之諭獄官邑今日決  
數事旬餘囹圄爲清減商算損酒價訪水利民聽已孚而去矣  
遮道擁車至有泣者曰官何來之暮而去之速乎康肅軫惠鄰  
里穀貴則損價以糴歲寒則賦粟以濟散藥給棺一方賴之公  
謹不敢廢湖山亭館以時整葺追慕不足築祠於堂之隩又以  
隱居詩篇刻石時節擷方薦新事之如生者舊有爲父母所厚  
者尊禮之如故時正旦合鄉之士夫於邑庠謁先聖先師及先  
賢之祠序齒講拜升堂舉酒略如鄉飲之儀爲文平淡援筆成  
詩蔚有父風合詩文十五卷藏於家莊重恬靜中無機心與人

交久而彌親不知者或以爲簡公不改其度寬裕容物無疾言  
遽色服用儉約而厚拊姻舊雖甚費不靳康肅嘗以歲侵爲愛  
公適歸自稽山白曰頃年得祿儲穀可數千斛舉以均濟親顏  
大喜殆有前輩麥舟之餘意使其得究於用可以及物可以亢  
宗而見於世者止此可哀也已碩人家黃巖承信郎義之女甫  
笄喪母已能任家政既歸於吳舅始丞郡而家尚窶寓族長之  
家光祿洎夫人俱存家法素嚴魯國病足已久矣夫子方從師  
友於外無娣姒之助以冢婦獨在梱內之責人以爲難光祿與  
夫人既喪用益窘小姑出適發奩具以佐之石井卜築竭所儲  
以資糜費康肅素好賓客不問家有無先意治具以俟所需康  
光緒僊居集卷之四 文外編 碑誌 四  
肅以賢婦稱之見於遺札其亡也夫子哭之甚哀吉州以作邑  
有聲連歲進擢以至大郡可以知興化義方之訓鄭丞既亡而  
吉州求嫡母之銘甚切又可以見碩人鳴鳩之德是皆可銘也  
已銘曰括之陽兮仙所居伊石井兮公之廬隄萬壑兮清流瀦  
夾明鏡兮澄冰壺偉康肅兮蚤垂車謝軒冕兮天爲徒君冢嫡  
兮如伯魚傳衣鉢兮鄴侯書宦學富兮歷仕途見諸用兮直緒  
餘歸不改兮先規模終相從兮山之隅夫人德兮鳴鳩如義方  
壺羹兮藹里閭我維銘兮子刻諸慰孝思兮賁幽墟

元

鞠隱先生墓碣

徐一夔

鞠隱先生諱嗣壽字得仁姓朱氏世居台之臨海十一世祖希述事宋爲殿中侍御史六傳至宣撫司掌機宜文字友直始遷仙居之東門又六傳至鄉貢進士懋先生之曾大父也大父智父元豪補武學生母應氏繼金氏先生幼聰悟讀書數行並下日記近萬言爲文詞濡筆伸紙立就汨汨千數百言若不煩構思者鄉校師奇之台自金華王氏得考亭夫子之傳講道上蔡書院從者甚眾而性理之學日盛先生旣長謂學不出此雖多無益也遂研窮濂洛諸書究極歸趨後凡爲文辭其爲說必本

光緒僊居集

卷之四

文外編

碑誌

五

之性命之蘊不爲華言綺語以誇耀世俗同郡紫巖周先生潤祖學術爲鄉里推重少與先生同舍相見論學先生高見層出周先生斂衽嘆服長潭陶君凱視先生差後出亦以文學知名四方每見先生輒以師禮待之先生嘗言世俗爲學不過資講說助佔畢求其躬行之實蓋有愧故其事父母凡力之所能爲者必盡力爲之父母歿哀戚幾毀治冢壙必如法不貽後憾其處兄弟間懼夫情誼之或乖也作順德堂以示意其弟旣分財異居而家頗落其歿也諸從子貧不克葬出己財葬之一不以累其子待宗黨不以貧富而禮義有厚薄鄉人稱之春秋祭祀必遵先正家禮時物不具則不以薦教子必以讀書爲先務

且戒之曰不讀書非吾子與孫也夕則坐堂上召其子與孫來前以序立問其日所事事申訓之至二鼓乃退以爲常其見諸行事蓋如此忠介公泰不花貫台州進士及第及其躋要路見台之老成前輩待之如鄉先生而待先生尤厚將以荐於朝時先生父已歿一日聞之貽書謝曰祿以逮親爲榮親已歿矣不願仕也公亦重違其志而止晚謝家事治別業於東園引流種樹以自適蒔鞠數十本曰鞠有隱操吾實愛焉乃號曰鞠隱學者尊之不斥其姓氏因稱曰鞠隱先生以至正十五年乙未十月二十一日卒年六十有九其配呂氏有賢行先十有三年歿子男二長公立次公成俱能世其學公成先四年卒女一適同

光緒僊居集

卷之四

文外編

碑誌

六

邑楊弘祖孫男六曰木曰松曰棠曰棣曰楫孫女一適同邑呂志尹曾孫男幾人曾孫女幾人皆尙幼先生歿十有一年公立奉柩葬之縣東門外若干里鄉曰慶雲山曰石牛原曰東嶽且奉其配祔焉實二十五年乙巳正月二日也公立既襄事謀於其友安陽韓君諤曰墓銘未有攸屬韓君曰銘非徐君不可遂請來銘銘曰爲學尙理而不尚多爲文尙質而不尚葩道不行於時而行於家斂華就實厥德孔嘉其歸也全抑又何嗟故天台朱府君霞塢阡表

宋 濂

孝子之於親曷嘗有紀極哉唯恐其嘉謨懿行不暴白於後世也件繫羣事旣有狀矣足以昭於人人又有元堂之銘銘比狀



著矣又有阡上之表焉蓋辭之重複者事必著甚哉孝子之心其有所慎乎仙居朱府君之卒多歷年所其子公立既請縣大夫前進士魏俊民爲之銘其二孫木棊猶以爲未足復來徵予文表於墓門揆於古義合矣予乃按狀而書之曰府君諱壽字得仁姓朱氏世居台之臨海宋殿中侍御史希述其遠祖也殿中君六世孫友直仕爲宣撫司某官始遷仙居之東門至府君又六世矣府君之生岐嶷而深沈豐厚而敏慧自爲童子時風翰孤鶩昂然野鶴之在鷄羣見者莫不異之及游鄉校嚅嚅羣經食芳而漱腴充然若有所得且曰古者爲學精神心術一寓之於事爲或慮其有不正也必資體驗擴充之功所以皓首窮

光緒僊居集

卷之四

文外編

碑誌

七

經不敢輕寘之若拈華摘艷鉅心剝腎於辭章間陋之陋者也自是撫世酬物一出於正而異端無實之說了若不經意事父母輒盡其孝奉異母之兄甚於同母者凡事必咨稟而後行遇弟有恩及其早捐館舍諸孤貧喪不得入土府君泣曰兄弟同氣也死而不葬吾心其安乎卽命堪輿家卜地而葬焉夫妻相敬如賓自委禽至髮白無反目之色教諸子力田孝弟不許事紛華靡麗遂名堂曰順德且賦詩以示意待族姻廬井曲盡人情不以貴富貧賤而爲薄厚疏數春秋祭其先儀文並循家禮升降跪拜如將見聞其容聲人取以爲法治家甚嚴子孫朝夕冠帶承候顏色拱聽訓飭不命之退不敢退也晚年築室東園

藝菊花數十本當秋高氣清金錢纍纍然布柔條間府君熟玩不忍釋去或對之酣觴清詠終日且謂人曰菊誠吾良友吾殆託之以逃名乎達忠介公兼善時出鎮於台閩府君有賢行將剡薦於朝府君謝曰仕將以得祿養親也親亡何以仕爲哉達公亦不敢強未幾遘疾府君度不能起召子若孫訓之曰吾晝夜兢兢業業以克至於今日非惟仰不愧俯不忤抑且可以見祖宗於地下汝等守爾孝弟篤爾忠信蹈爾禮義厲爾廉恥庶幾不陷於有過之域吾雖死將含笑入地矣已而遂卒時至正乙未十月二十一日也享年六十又九府君曾祖懋宋鄉貢進士祖智父元豪補武學生妣應氏金氏府君金出也娶同縣呂氏先十三年卒子男子二公立公成公成先四年卒子女子一適楊弘祖孫男六木松棠棣棣楫木棊卽來謁文者孫女一歸呂志尹卒後當某年月日葬於縣東一里馬島山霞塢之原禮也嗚呼士君子之立身也其功名烜赫於世則登名國史其次焉則書於郡志又其次焉則藉薦紳之立言者以傳及其久也未嘗不與史志相爲韻頗有若府君之行斥乎澆漓葆乎醇熙一本乎真誠而弗事乎詭隨此所謂一鄉之善士非歟是宜揭之崇阡以爲聳善扶世之計而所愧者予非其人也雖然予久居禁林海內名公卿及賢士大夫所銘者多矣鮮有徵文於十九年之後者而木與棊有焉則其以不忘乎親可知矣予雖欲

辭之而烏能辭之若木與槩者亦可謂之孝孫矣乎是爲表

天台顧氏先德碑

宋 濂

顧氏之系出江左其後遷金華尋復由金華徙天台相傳以爲顧歡之後歡梁之隱君子也故其地有顧儒領有歡溪然世遠宗堙莫能知其詳矣至宋南渡後有諱知言者字孚先通黃帝內經之學人有疾注藥起之無靳色會疫癘大興孚先裹良劑日巡戶而與之鄉人感其賜有搏土肖像以爲壽者以子貴累贈宣教郎生商卿周卿商卿字方子用薦者爲鄉郡學官遂以明經講授從之者皆爲純篤君子出言制行能使人慕艷不置閱閱家綦氏伯仲爭以門資叙爵幾至破家方子片言論之輒

光緒僊居集

卷之四

文外編

碑誌

九

頓首謝過以官讓其兄周卿字成子擢嘉定癸未進士第官至朝奉郎奉國軍簽判初娶貴族施氏貲裝甚豐成子夜讀書隱几而臥施戲泚筆塗其面及覺大怒曰合尅未旬日乃敢爾耶所謂相敬如賓者何在坐以待旦斥出之再配楊氏無子抱方子之子育之乳因有渾方子孫玉文字温夫咸淳甲戌武舉第一人授秉節郎殿前司同正將德祐丙子元兵入台執其父申欲殺之温夫抱父頸而號曰甯殺我甯殺我無害吾父温夫被劊而免因以跛廢初温夫議娶應氏已納采忽折其脛眾勸之改圖温夫不聽曰言猶在耳焉敢背之彼體雖虧而行未嘗虧何傷乎應後得婦道甚爲一家之師從兄壘翁死以孤子托之

溫夫授經納配不翅已出者溫夫子鎔字可範年十三試藝鄉校頃刻而就人目爲神童丞相吳公堅以孫女妻之大母葉氏與其母春秋皆高可範先意承顏惟恐有不及兄鎬早世諸孤呱呱然無依羞服婚姻皆可範主之然自宣教府君以下族屬頗眾正月之吉與日長至大合其族行聚拜之禮親之近者浹旬則一會飲酒哦詩情文藹如也有不至者罰及之凡遇疾疢死喪輒皇皇往視蹙額弗舒且暮必謁先祠大寒暑不易人取以爲法焉家畜二貓皆孕一旣產出爲人所繫未產者往乳之及其歸也同一窟而哺子人以爲和氣之應鄉井服可範之化苟有赴愬不之公府而唯其言是聽皆悅服而去里有陽歸堰

光緒僊居集

卷之四

文外編

碑誌

十

溉田萬畝當農功將興可範必繕築以利民糧書之修閭師並緣爲姦利可範履畝而覈其實鄉鄰德之可範性端恪子姓有不善面折不恕然其律身尤嚴日抵暮輒懸燈書其言行於籍不可書則不爲年九十二忽無疾而卒惟天台素爲文獻之邦如南塘陳茂卿謙齋吳清之直軒吳直翁慥堂鄭景溫是四君子者皆與聞濂洛關閩之學故其鄉邦之間金春而玉應宮奏而商宣所以咸有士君子之操如顧氏一門是已然其嘉言善行多可書已見墓文固可傳諸不朽其或聞之父老之口者歷年滋多恐日就泯泯族孫石樓縣令碩乃件繫之請予爲之記嗚呼世之求文者奚翅數百罔不欲譽己之善而於其先德則

未嘗少留意焉碩乃能一反其所爲得非知識度越於人哉因  
不欲辭而書以遺之使碩之後人庶幾有所徵焉奉議大夫國  
子司業金華宋濂撰

光緒僊居集



卷之四

文外編

碑誌

十一

一

明

故仙居陳府君墓誌銘

宋 濂

古者鼎有銘銘者自名也自名以稱揚其先祖之美而明著之於後世也嗚呼孝子慈孫欲顯其親也尙矣後世不銘之於鼎而以懸棺之石代之不自著名而假諸能言者述之其事雖殊而其心一也台之仙居有陳瑜者自縣諸生選入太學與子鬼中書舍人璉交甚洽瑜方被旨覈實征稅於吉安而以父憂還瑜思有以顯其親走湖州謁教授童君冀摭其孝行成狀復持璉書走青蘿山中請予製銘樹之於墓道蓋瑜之先本金華人六世祖始遷而予與童君皆世占金華之籍鄉人之言當取信光緒僊居集卷之四 文外編 碑誌 十二

於世此瑜之意尤加勤者也予何敢辭瑜之父諱嗣字自得母夫人青年喪夫以貞節自持自得養之無不竭其衷夫人春秋高沉疴荏苒陰虧不足以制陽痰液膠澀口鼻間氣弱不可出鬱塞無以自暢自得跪牀下噲而吐之日以爲常嗚呼汚惡人之所難近自得爲之若易易然非其心誠愛親者不能也斯事且爾則凡謹衣之煖寒藥之升降食之蚤莫宜不言而可諭矣嗚呼人子之身親體所分也何敢有焉身且不敢有則凡痒痾疾痛舉切於心生養死藏必誠必信而無錙銖之不盡焉如自得者殆將無慊於茲也使自得享有爵位則移而達之事君也必忠惠民也必仁臨下也必寬惜爲時命所拘而所及者不過

振其宗媿卹其比鄰而已可勝嘆哉孔子之教以孝爲天經地  
義諄諄然著之於經予學孔子者也自得孝行有如是者烏得  
不揚之章之以爲世勸乎自得性嗜學幼時厄於單窶晝則注  
意米鹽細務夜則爇薪誦書逮長家寢饒遇有可矜輒施與不  
靳鄉黨稱爲善士生於元延祐乙卯正月十四日歿於國朝洪  
武戊午三月二十三日壽六十四卜以明年己未某月日葬於  
某山之原曾祖儼祖淳父宏義母陸氏元配王氏先卒繼室董  
氏子男子三人長瑜有文學温温然如玉卽來徵銘者次璞次  
琳皆業儒子女子二適某某云銘曰家產千金埒於封君苟子  
道無聞愧於七尺之身三組銀黃爲卿爲郎儻昧其天常筋骸  
光緒僊居集卷之四 文外編 碑誌 十三

雖彊而人心已亡君子哉若人篤孝於親瑞世之珍鳳凰麒麟  
倬史造文勒石墓門以揚清芬以勸其後昆

礮磴子碣

宋 濂

礮磴子鄭氏諱斗字德方台仙居人仙居有山高峙者曰石礮  
磴而礮磴子適家其下人以其德峻拔與山類因號之曰礮磴  
子云礮磴子少有偉氣學書未成舍去攻醫以藥人病者至視  
其貧卽畀以藥不問直有無大疫起比舍駢首臥媿戚畏懦莫  
敢顧礮磴子袖藥出入疫家躬和煮治療不少有倦色人德之  
既而礮磴子益壯乃更悔悟謂吾先人本以儒顯聞吾可易他  
術竊先人名卽以藥肆授族人之貧者而刻志於學凡聖賢經

訓及古今成敗之籍皆探究奧密抉摘端緒身由而志存之形  
諸言動文辭蔚然有古風正家睦族具有典法推其餘以周卹  
人汲汲不厭元至正癸巳大旱民或鬻子以食礪磴子戚之擇  
腴田易粟富人以賑饑者數百家賴不孳死後二年海坻作亂  
礪磴子率鄉人避其難偕行者或攘人雞礪磴子不忍責私以  
貲償之後咸悔戢不敢肆盜發括蒼將犯礪磴子鄉邑礪磴子  
戴鐵帽杖鐵杖練習里中子弟爲隊伍以備之盜聞解去守將  
知礪磴子才可用遣使者持幣躋廬起礪磴子謀其軍事礪磴  
子知亂不可救拒弗納已而元亡礪磴子亦且老矣遂隱不復  
仕惟日推所聞知授其徒同姓來學者飲食之礪磴子方嚴好

光緒僊居集

卷之四

文外編

碑誌

十四

有義非義者以禮開說使入於善故存而鄉人以爲師既卒咸  
悼惜以爲失所依礪磴年六十國朝洪武十二年二月廿有七  
日卒於家明年正月四日葬於七里之原礪磴子裔出漢安遠  
侯吉宋建隆初有名修者自永嘉徙仙居歷十一世至戶部侍  
郎雄飛以文學發聞於時台學祠六君子戶部其一也從子憲  
爲國子博士遭亂死於孝博士之兄慰實爲礪磴子之曾祖大  
父合父樞妣張氏宋司諫次賢之孫元慶元路教授國真之女  
夫蚤死以貞節稱礪磴子娶妣兄之女先八年卒三男子曰光  
明日顯則曰光韜顯則黃氏出推擇爲縣弟子員貢太學選高  
等以鄉先生張君熙狀請銘余與台士游固知其多奇才晚乃



得確磴子焉於是知余於台士未足以盡交之也銘曰少而奇壯勇於爲愈老不衰誰執其機弗大其施有積無虧惟後之垂

仙居張處士墓誌銘

方孝孺

余教漢中連以職事趨京師道秦必朝於王而後行每朝必承訪問賜酒食始遣去典儀副張君六成贊導進止具有儀法其奉上待人一以誠確予故熟識之去年冬自京師校文還六成館焉接其人與之言論愈熟蓋所謂端士而余同郡仙居人也旣而六成爲余述其父處士事輒泣下余曰豈於死生之奉有所憾耶六成曰吾與兄德恭事吾父雖不能致養然於子道不敢失所憾者吾父有德行稱善人於鄉而墓石未有述且吾父

光緒僊居集

卷之四

文外編

碑誌

十五

年僅五十有一生旣不獲享壽考於時使沒而弗彰顯其志於將來是重天吾父也敢於子也請予讓非其人六成以右長史茅君大方之狀請益固及考其狀處士之先居縣南之薦谷宗人有諱時舉者居南澗坊無子處士父嗣宗後之其家富而好施閭里德其惠處士諱文道字希道其學務達倫理大義其事親孝而有禮居喪哀而有節事繼母視其嫡無不及焉遇兄弟有恩意終其身不少衰待鄉里承父志不倦元季兵起避去山中鄉人或竊取其家資後值其人陽爲弗知者其人慚謝以所竊自歸處士謝遣之其寬厚皆類此娶徐氏二子德恭六成也其卒以洪武甲寅三月某日葬以某年月日墓在東嶺之原台

屬邑五俗愿樸儉素惟仙居爲尤士多尙行好義不爲華言麗飾往往有古長者風如處士者是矣惜其歿於田里不克推其得於躬者以化澆競之習也然六成典大國之禮人多敬其賢處士之澤其將在茲乎銘曰其學也懋其行也卓其位卑而施不博尙其後也克享餘澤

岫雲先生墓誌銘

王叔英

岫雲先生台仙居人也姓朱氏朱爲仙居名族先生天質秀美而又自幼習聞父兄詩書禮義之教故其爲人篤學而敦於行義其爲子也則孝其爲兄與弟也則友睦於親族而嫻於婚戚於朋友則有信於鄰里鄉黨之困乏無告者亦有以恤之賓客

光緒僊居集

卷之四

文外編

碑誌

十六

之過其門者必盡其款接之情或以其所乏告者又必資之以去其兄顛齋先生蚤以行義著聞遠邇而先生與之齊名故仙居之人出遊他郡邑者士大夫遇之未嘗不以二先生爲問而士大夫之遇仙居者未嘗不求見先生而禮於其廬其爲人所重如此蓋二先生之貌旣皆魁梧秀偉有出於人而行又稱之故仙居之有二先生猶草木之有華實人面之有眉目也及其一旦相繼而死凡知二先生者莫不惜之而仙居之人惜之尤甚嗚乎是可謂一邦之望人矣先生之卒由顛齋先生爲解其媼家訟事被逮入京而先生繼往省候至則顛齋已卒先生哭泣收斂旣哀且勞以是得疾亦卒於京師客舍初先生之將省

兄入京也與先生親厚者多以年且老不宜涉遠止之先生曰  
吾兄老矣吾豈可坐聽其存亡從行子姓未甚更事脫有不諱  
吾何以自甯不如無生已遂決志而往果得以親斂其兄屍而  
卒卒時年五十有六臨卒顧謂其從行子姓曰吾得以收吾兄  
死不恨矣其平生篤行大率類此先生性冲澹喜閑適邑之賢  
令王從古嘗請先生副教邑庠未幾以疾辭歸闢一室爲燕居  
之所聚書數千卷及漢魏以來諸石刻書數百本與凡文藝具  
於其中家事悉委諸妻子未嘗以毫髮目累而專以讀書賦詩  
鼓琴作篆隸書爲樂嘗出遊山谷見巖岫間雲氣悠揚自如曰  
吾視世間物與吾意合者惟此耳因以岫雲自號人亦以其號

光緒僊居集卷之四 文外編 碑誌 十七

亡甚當故不稱其姓字而咸以岫雲先生稱之先生諱棐字季  
誠其先臨海人宋殿中侍御史希述其若干世祖也自若干世  
祖某始遷居於仙居之東門遂爲仙居人曾大父諱元豪大父  
諱嗣壽父諱公立皆有善行曾大母某氏大母某氏母金氏亦  
咸有淑德配呂氏有婦道善理家事後先生若干年某月某日  
卒子男一人照克承父志孫男四人墳塢塹某女一人先生卒  
於洪武二十二年十二月某日與其配呂氏合葬於某鄉某山  
實在其先考妣之墓側銘曰德不貴異曰維其粹行不貴奇曰  
維其彝勿謂不官其名亦尊勿謂不祿其身亦足生雖不壽亦  
不爲夭死雖不家而得其道其積旣厚其嗣宜昌子子孫孫念

茲勿忘

趙處士墓誌銘

王叔英

古之人有不知其人則視其友及其子與其平生之所好而可以知之者余於仙居趙處士亦然余生既後於處士而居又異邑故不及交處士以識其爲人及來佐教仙居而處士違世已十五年矣然邑之先輩與余友若朱季敬季誠二先生者實處士之深友而處士之子古銘又從余遊余以是而知處士焉蓋二朱先生文學行義著稱爲邑望人非其人不交而與處士友甚深則處士亦有文學行義與人相上下可知矣其子古銘少孤而克樹立以謹厚溫良忠信樂善見重於人則處士之教有

光緒僊居集

卷之四

文外編

碑誌

十八

以行於家者又可知矣余嘗從二朱先生過其里所謂下灘者而二朱先生顧瞻嗟嘆久之余問其故則曰此吾亡友趙君退居之地其居地之東南有封坐在焉則趙君之墓也昔趙君初居邑市厭其喧囂而築室於茲濬陂爲池種竹爲林以爲燕閑之樂而因以水竹名其居吾二人每過而訪焉則必爲之留戀觴詠終日而去今其地雖存而人則亡矣其墓之有宿草者十七年矣是以過之而不自覺其感傷於中余於是而益知處士之爲人蓋爲清修拔俗之士無疑矣夫以其友以其子如此而其平生之所好又如此孰謂其人不賢而有是乎古銘以墓銘有缺將作而追納之則求其媼友前石樓令顧君狀處士之行

而求文於余予觀其狀載處士之事頗詳而其大者亦頗與余之所自得於處士者相符故畧其細而獨以余之所自得者書之而并爲書其諱字世系卒葬而爲之銘處士諱嗣衡字叔志宋魏王廷美之十一世孫由曾祖沅夫娶滁洲知府仙居陳充女始居於仙居遂爲仙居人祖諱時栗父諱若愚母吳氏子男三人其存者二人曰古錫古銘一人曰古鋌早死孫男二人次準次間女一人其卒以洪武六年八月初九日得年四十七其卒之所所謂水竹居是也以洪武十二年十二月十五日與其配陶氏合葬其葬之地所謂下灘是也銘曰其卒也久而思其存者有友其葬也幾而圖其存者有子嗟哉趙君可以永聞

光緒僊居集

卷之四

文外編

碑誌

十九

贈承直郎襄府審理張公墓碣銘

新淦

金幼孜

名善以字行號退菴

張故爲宦族連世有聞其先有曷者仕宋自天台徙今之仙居德善垂延肇興厥家曷之後有登紹熙進士第曰次賢者累官左司諫贈中奉大夫則公之六世祖也公曾大父可貴仕元慶元路儒學教授贈騎都上尉清河郡伯大父漢章贈輕騎都尉清河郡侯考惟賢海道巡防義兵萬戶以功得追封先世故可貴漢章皆以惟賢貴贈也公諱宅相字景舒今贈襄王府審理正公母清河郡夫人郭氏生公有偉質其舅某見而奇之曰吾家宅相也故因以名公夙承家訓讀書樂善日惟不及天性純孝事親婉愉承顏雍容和悅篤厚宗族恩意周浹內外無間言

者萬戶公歿公獨膺家政嘗長鄉之租稅廉介不阿公家徵需百務皆已出不以煩人所居鄉宦寺田多重租小民不堪逃徙者衆公遂以己田均其租由是流移者復歸公私便之洪武甲子歲大飢人殍死相屬公發庫賑給賴以全活者數十家其處心仁恕率皆類此卒於癸酉歲十二月二日享年四十有七娶郭氏事姑以孝聞後公廿有六年卒今贈安人其葬在鄉西奧先隴之次安人合祔焉子男四人伯昭伯溫伯昇伯厚以材徵初授北京行部主事改襄府審理正稱於其職女一人孫男十人伯厚間以其友北京行部主事李茂宏所狀事行來請銘揭諸其阡乃序次之如此而爲之銘曰胄之華兮多顯揚善光緒僊居集卷之四 文外編 碑誌 二十一

配前光

明處士應公暨配貞節陳氏墓碑

高陵 呂

枏字仲木號涇野

公諱宗儒字紹元姓應氏世爲台仙居之西山人節軒先生之第四子也節軒偉儀雅度敦厚博大讀書有才識孝友皆出天授而又多行陰德孚於鄉人故公受性顯允美髯長大剛正自幼未嘗習機變之巧其治家極嚴有威如嗃嗃之象與人交洞開肺腑無少藏匿見人之善則曰爾若是善也得無福乎見人不善侃侃然語不虞後患雖在賓友親故之間方當從容狎口之際小不合意輒峻語斥之拂衣裳起去久則復歡如初蓋驥

駿乎古之不念舊惡者矣其視人有患難直若疾痛在己力可  
援拔必使獲安乃已周貧恤乏咸出惻隱雖至傾竭寡衣而缺  
食不吝也乃年三十而卒在正統九年月日所配夫人陳氏時  
年二十八號絕抱尸若不欲生七日水漿不入口比至葬皆無  
越禮公有遺田二頃積貲亦豐而諸孤方孩提宗人有利之者  
諷使再適不從撼之以陵侮不從則託以徭役賦稅日朘月削  
亦不校也子長且遣事塾師暮歸執業課之其於小學孝經論  
語諸書亦爲解其大義至以織紵纂組伴至夜分嘗歲飢饉視  
其倉困囊箱喟然曰此禍本也悉揮散之而睥睨者止厥後家  
既屢空公有遺馬無所於用或勸售諸乃對曰此夫子生時之

光緒僊居集

卷之四

文外編

碑誌

二十一

所愛者也吾何忍無惟蓋之義乎終不售甘淡泊未嘗烹魚牲  
食肉不過二三筋居處整肅子孫服食語動稍非禮輒笞責之  
雖子孫相擊鼓戲曰鼓不亂聲門內寂如無人乃宏治庚戌子  
某以其情事聞於朝詔旌其閭所謂貞節者也蓋陳父從謙邑  
大姓有學行而陳受性卽淑慎嫻於姆教云歿年八十有八嗚  
呼陳與公壽之修短雖不等其德皆古之烈丈夫貞女行殊未  
可優劣也子男三粟旭昌昌者行重於鄉爲分宜縣尉介特不  
苟有漢孝廉方正之風人稱分宜云孫男七治湘敏河良廣良  
與柎同年進士爲翰林編修忠信廣遠勵志於道柎所資益多  
矣公父子元積潛遺高極而發者其在斯乎辭曰道不虛傳德

有後光厥前不偉厥後焉彰譬彼流川泉深委長公之作止有烈其芳漢陳太邱晉王彥方懿厥休配孕此軻滂瑰瑰芝樹毓秀於良同不混俗異不貶方我友孫止爲我之明或暗於義或疑於行於質斯別於方斯將公之休門不啻文章迹其積也行路是諒

應方伯良墓誌

安福 鄒守益 字謙之

嘉靖己酉冬十二月十二日仙居南洲應公卒於正寢逾年以倭寇奔軼諸孤木等奉葬於南溪先塋之右甲寅木等以狀徵於林州守元倫丙辰門人景山李僉憲一瀚以銘告於守益守益與公登第同公宅繼母憂益侍先大夫疾其南歸同逾十二

光緒僊居集 卷之四 文外編 碑誌 二十二

年今上紹統始北上其入史局同益下獄謫公杖闕下其得罪同公參廣西迂道訪山中握手道生平甚洽嘗約升天台訪公而遂成隔世矣謹披淚銘之以洩予哀應氏徙仙居西山自諱翁之始曾大父文正大父宗儒以農爲業大母陳以節旌閭父慎齋翁昌讀書有孝行任分宜縣典史有惠政鄉賢名宦並崇祀焉公諱良字元忠別號南洲聰睿不羣七歲喪母哀毀如成人就外傳博誦經史雖瘡甚粘於席罔廢業父憐之戒勿讀俟外出誦不輟且能通大意十三入郡庠自勵號舍中清淡不堪每至忠孝節義事輒憤激若身當之及成進士避逆瑾引疾歸比讀中秘書友甘泉陽明二先生既有得折節執弟子禮與四



方豪傑倡學論政務見諸實功既歸從遊者日眾率隨才就之  
鄭少谷自閩來訪與應石門黃久菴大雪聚講巾山顧東橋爲  
郡守作玉輝堂以紀其盛御史朱君節吳君華陳君察交荐之  
與呂涇野湛甘泉同刻慎齋翁促其行授編修得封父如其官  
而母許氏孫氏俱太孺人時大禮議起桂見山素厚公欲招爲  
助謝不往卒隨眾受杖瀕危困始甦奉冊封唐王及妃驢贈無  
所受中途兩告病不允尋聞父訃徒跣奔歸執禮謹甚服闋陞  
山東副使督學政時毀像沙汰之例行處之各得其方闡明師  
教以身爲率士心日悅以積勞成疾上疏乞休撫接暨銓部交  
留之至有德望老成樹揭幟幟風厲一方之喪逾二年陞河南

光緒僊居集

卷之四

文外編

碑誌

二十三

一

參政尋調廣西以督糧餉察邊務爲職蓋有謗言矣公論量田  
賑荒諸事暨阻創狼寨立打手營侃然自持至今惠流於民而  
權勢朋謀嗾之故雖陟廣東竟以罷輒歸薛給事中宗鎰上疏  
稱冤極論黨同伐異之蠹格於例不報公處之夷然立祠宇輯  
家譜以孝弟爲子姓先朔望宴享斬斬成一家規尤不忘民瘼  
遇旱躬歷巖嶽祈禱多應歲凶力言郡邑奏荒賑恤鄉人賴之  
而無或干以私待宗族有恩以進士坊價買田三十畝分佃族  
之貧者而不收其稅公美鬚髯善談吐慷慨超物表別時之忠  
佞若涇渭與人交傾竭肺腑竟日忘去聞一善必揚之後或負  
所聞不爲悔閒居小樓披閱古今或瞑目靜坐夜半或披衣索

燭劇飲浩歌人以爲異而自得道如也年逾七十矣猶冒山谿拜誠意伯祠下爲贊以表夙志董郡守廉其食貧欲厚賙之飄然拒謝而歸其自奉蠶衣糲食終其身不變所著述梓行有孝經正誤顏氏家訓海道經聞善錄聞微錄旌忠錄訂正魯齋遺書遜志齋集西山應氏家乘其詩文若干卷藏於家配張氏東郭翁琦之女察於諸生而歸之子男四本太學生先公歿次木材穀皆邑庠生克嗣公之志女三適太學生黃承道邑庠生朱霍顧義根孫男七煒炁燾默焯焯炁邑庠生女一尙幼景山蒞吾邑守己愛民不愧師友茲復篤於存沒惻惻圖永懿行則公之敦學其有徵云

光緒僊居集

卷之四

文外編

碑誌

二十四

贈中憲大夫南京都察院右僉都御史率菴吳公墓表

華亭 徐階 字子升

吳氏出延陵季子後徙括之遂昌唐國子祭酒全智避寇徙仙居其子孫遂爲仙居人祭酒後四世曰福九世曰芹十世曰渭相繼以讓金出粟聞邑人號其里曰厚仁事載通史宋時舉科第者前後四十六人而龍圖學士康肅公芾與其兄知府謙西安令詠文行尤著元之興吳氏相戒勿食其祿故迄元無仕者入國朝叔深始以邑庠生貢授汀州經歷有子七人其叔子榮贊與季榮賀榮泰皆有能文聲賀泰次第領鄉薦贊兄也顧詘於場屋乃遂棄去竭貲以教其子則公是也公學不專章句嘗

師竹岡趙先生聞身心之說長補邑庠生朋輩咸推遜之復不第如其父歎曰夫道率性而已吾安能糜身外之榮僕僕隨人後耶因自號率庵不復事進取而專志教中丞君亦如其父之所以教者嘉靖癸丑中丞舉進士司刑松江戒之曰吾聞士始入官持法平則往往見謂不及其苛於治獄深文而巧詆者眾率以爲材然其仁與暴則有間矣吾願兒爲彼勿爲此也故中丞之於聽斷廉而恕明而不察松之人至今懷之倭奴寇松中丞晝夜寢城上爲戰守備公遣人致酒食必戒曰毋內顧而恆私念松以財賦名天下城顛卑且薄不可守由是得鬱疾右目失明焉後三年中丞徵拜刑科給事中劾奏時宰諸不法狀時光緒僊居集卷之四 文外編 碑誌 二十五

宰爲飛語激怒世宗逮下詔獄訊所主使中丞正色謂兩鎮撫曰若誤矣吾草疏時自分必不生卽妻子不以告况受主使於人耶兩鎮撫怒訊加嚴中丞不勝痛詭曰有已則曰昔皇祖設科臣付之以言責緘默者有常刑凡吾所以言者太廟神靈使我也兩鎮撫大怒訊之與重辟等則又詭曰有已則曰昔孔子作經教人臣以死忠吾幼而誦法焉乃茲有言孔子使我也兩鎮撫益怒盡取諸獄具徧訊之皮肉潰裂至不可復訊則又詭曰有已則仰天歎曰天生人而賦之忠義之性遇事則必言自龍逢比干迄於今士以忠義殞其身者眾矣吾性乃與彼類然則上帝使我也兩鎮撫怒益甚訊亦益酷氣絕者再終不改詞

易色世宗聞而奇之詔宥死謫戍橫州中丞既得出爲書告公謝不孝比見公武林又跪以謝公曰吾以汝爲已死今不慕倖生且獲保其生天子之恩至矣吾吳氏之幸大矣復何謝焉公與中丞別而歸身自課耕歲以其入之半餉中丞於橫當是時公父子方厄士大夫亦多欲賙公乃公毅然不可動以利仙居令將毀富民張某室以爲城某厚賂公求免迄不爲之請也甲子元旦邑人訛言中丞死公卽以其日走視屬廣方用兵冒瘴癘出入戎馬間歷四月始達中丞固無恙留橫一年以乙丑二月十七日歸至蒼梧得暴疾卒其秋中丞奉公柩將祔於西塚宋贈夫人葉氏墓側沮於族之有力者遂葬思敬山葬後一年

光緒僊居集

卷之四

文外編

碑誌

二十六

今上登極奉遺詔旌直臣首召中丞以爲吏科右給事中明年遷順天府丞尋遷南京都察院右僉都御史提督操江公亦自右給事贈如其官於是中丞泣謂予曰吾父卒於道路蓋以不肖孤茲幸褒寵於朝而墓前之石未有刻恐其行將遂隱沒不得與制詞同光顯於永从 不肖孤其何以見吾父地下敢以表請公爲人諒直坦夷持身居家事有矩武施於其宗推之鄰里皆有惠愛然予以爲表也者表其行之大者也故不及詳而獨叙其在父子間者如此使後世知中丞之奇節與凡善政其成蓋有自云公諱炳臺字朝望生宏治乙卯六月二十一日享年六十九配贈恭人王氏能以孝敬勤儉佐公生中丞五年年二

十九而卒公賢且哀之爲不再娶語在其誌中

### 吳參議廉墓表

吳遵

所貴士君子之顯於時也學有本原言必識大體重風節畧權勢平居能銷禍本以安社稷進退較然一軌於道不媿嬰隨世以就功名見幾而作若牛田吳公其庶幾哉公諱廉字介夫浙之仙居人其先世隱於農曾大父立遠好義活人稱長者大父文魁以齒德賓於鄉父默齋公諱珪能行孝修其先人之業其所淵源遠矣公生而穎特七歲善大書見者驚異稍長領正德丁卯浙江鄉薦卒業南雍交友四方名達學益蒸蒸日上甲戌成進士以憂去免服授禮科給事中亢直敢言言必持國家光緒僊居集卷之四 文外編 碑誌 二十七 大體時郭武定張壽甯以勲戚當上意貴幸無比公首論二家驕蹇失儀詔巡視十二團營團營將卒多根柢權貴人悍迂非法公至風采凜然知憚矣適武廟巡行西北邊公偕同官泣留跪午門外三日諫曰陛下多狎游忘大計本朝土木爲監不遠宜速返駕以安人心奠宗社時宮保大中丞王陳估權爭進公論宜並斥而薦堪其代者林公俊王公守仁光祿馮卿抗語讎言官公又疏人臣不當肆言詆讖以傷國體正德末儲貳未建人懷異謀公旦夕憂心怦然會逆奄畢鎮守江西表宸濠孝行於朝冀召入太廟司香陰爲內應厥日詔書會典例不得表薦親藩豈宜黨翼阿私助王弗靖據禮封還事遂寢未幾濠果以

叛誅駕旋返公又請郊天策士以追帝王盛節請罷江西鎮守  
中外稱便轉戶科右給事中今上嗣統首條四事曰正君心開  
言路時經筵近儒臣奏上上嘉納中官賴某蕭某者佞倖臣也  
公疏請亟除奸惡不報蓋自是公直聲動朝廷而在事者多指  
目怒公矣已而公覈餉湘貴間二御史皆弗往公獨行釐正宿  
弊多所建白轉禮科左給事中於是忌公者愈益不能安公矣  
出爲四川左參議公按蜀甫葑蠲害興利糾重臣之使蜀殃民  
者民賴以蘇其爲政主於恤民隱察吏治正紀綱明教化顧性  
獨耿介不能逐時好爲頽仰三疏乞歸雖當路合辭留之竟不  
可奪公歸築舍城北隅讀書詠歌灌蕤松菊意陶陶樂也公孝  
光緒僊居集 卷之四 文外編 碑誌 二十八

女性成父疾不解帶奔母喪徒跣號泣以祿弗逮養持恨終其  
身平居自奉粗糲雖已貴不移其初遇弟昆姻故有窮乏者賙  
之唯恐弗逮同官戴司諫死於言公手殮之醮贖買田以恤其  
孤許游擊以事餽千金公正色斥去忠臣盧公迴鄭公恕幾沒  
沒已公請建雙忠祠以勵頽俗此其敦倫尚行矯矯風節未嘗  
以窮達勢利生死二其心也倭夷寇浙東仙居大被焚掠獨曰  
吳家清官相戒無犯豈非忠信內積之效哉蓋公自垂髫恥外  
驚屏居默坐學多自得故其言粹白簡明一本於性情忠愛使  
當時能安其身於朝廷之上言聽志行得以悟君心斥邪惡其  
功業詎宜止是况武廟時國本尚疑人情洶洶使勲威橫奄豎

入羣奸陰伺於內強藩稱亂圖危社稷天下事未可知也公潛折奸萌一言重於九鼎彼有佞首脂韋毛舉細故以塞責視公不重有泚哉且其進必行道退必求志超然明哲之歸避遠機穿不至於名辱身危以死所謂介不終日者非耶制詞稱公建明國是糾正官非大司馬胡公叙其遺書亦曰黃髮清風鴻羽儀吉樂爲銘墓而亟稱焉公亦足以瞑已乃其嗣學博子龍復徵予言以表墓前之石予姑誌其大者耳厥配滕氏封孺人令德偕老合葬某山他日式公之墓低徊而不去者其尚於公有興起哉

貞節郭安人張氏墓誌銘

金賁亨

光緒僊居集

卷之四

文外編

碑誌

二十九

昔余未解褐嘗游仙居之萬竹山山之主入爲大參壘齋王公每晴日輒歷山厓谷多談節義事一日爲余言郭母張安人之賢且誦其所作柏舟歌後更無詩阿母於今女伯夷之句時安人之孫斐實負笈從余因過其家見二老人焉儀觀整整色笑可親蓋安人二子也孝友和樂之風生於庭庀余用以徵壘齋之言迄余宦遊以歸二十年間安人與二子與斐相繼淪沒交游之誼實悵余懷已而斐之弟校以其從兄梓所爲狀謁余拜且泣曰先王母幸克襄事先君伯仲耐焉信後之名敢有需於先生先生雅知吾家其忍辭余時以外艱不親筆硯滯諾於今按狀北山之郭邑南之張皆仙居鉅姓安人年十八歸於子明

氏諱鑿者越四年而子明卒安人矢無他志撫幼孤植門戶如  
忠臣於國無一念及其私二孤長且立老而作祖安人尚無恙  
嘉靖丙戌季秋之望以疾終距正統壬戌得年八十有五越己  
亥臘月戊寅乃窆其地曰汪塢頭蓋所窆以同穴者也子曰瀚  
存蓄別號時介曰濱存廣別號樂易所謂二老人者存蓄生天  
順辛巳卒年六十有九爲嘉靖己丑其配吳先五年而生先二  
十有六年而卒存廣生天順壬午卒年七十有四爲嘉靖乙未  
其配則壘齋公女也存蓄與吳與其仲葬同安人之日孫男曰  
楠曰梓曰斐曰櫟曰校曰檣梓讀書好禮斐梓皆有聲巽舍斐  
已廩未及一試而沒爲可痛云曾孫男凡二十有三人銘曰婦  
光緒僊居集

卷之四

文外編

碑誌

三十

道柔其節也剛立子五常天道遠其應也邇篤爾孫子嗚呼茲  
山一坏以障頽流



國朝

吳巨喬先生墓誌銘

金華 姜敏修 梅生

君諱幹字巨喬仙居之太學生也居家孝友和於鄉遇急難矧恤無德色鄉閭小不睦輒爲排解而性方正人不敢干以私也其居鄉足不履城市尤好讀書延師督課不惜費而未嘗談進取事歲己未嗣君舉於鄉人賀之君不色喜曰功名餘事也讀書貴明大義耳及談古今忠義事則娓娓不少倦蓋素所蓄積然也辛酉之變賊由婺竄括蒼風鶴之警及於台台屬洶洶守陴者遁矣紳富輦重貲攜妻子爲避寇計君乃慷慨出集義勇糾鄉閭議所以捍賊有以暫避請者君不許曰死生命也財物

光緒僊居集

卷之四

文外編

碑誌

三十一

可長守耶且若是是授賊隙也命各攜老弱以避而身率眾出賊至敗之未幾復戰君奮勇直前所向披靡而賊益眾鋒益銳勢不可遏遂被傷左右掖君潰圍出議再舉而君以傷重歿矣歿時猶惓惓以滅賊爲囑無他言嗚呼 國家養士數百年設官千百職封疆郡縣珪墨不同其守土則一也不幸有事受國恩當死爲民望當死平居激昂談節義尤當死而往往不死君一上舍生無尺寸柄足號召鄉里而計不反顧議不旋踵觸白刃冒流矢率義旅以撓賊鋒屢戰不屈卒以身殉固台之民好義哉抑君之忠勇奮發急國家之難而樂盡人臣之義者其激厲爲何如也君旣沒而嗣君副貢生玉叔卒復父仇糾勇殺

賊復其城 上憲聞而嘉之請於 朝得 褒卹君於 國爲  
忠嗣君於君爲孝其可傳也矣予不佞承嗣君之囑而欽君之  
義烈於勿諼也其敢以不文辭

銘曰青犢遭災紅羊應劫城尠完郭郡無全邑烈烈吳君爲時  
之傑投袂而起大呼殺賊奮挺如雲同仇同德一戰再戰肉饑  
血渴賊眾兵單志伸力屈義效結纓忠全裹革嗣子哀哀枕戈  
渴血卒刃父仇保全鄉國大吏以聞 皇仁用惻撫存恤亡崇  
阡高揭自教之衰士無完節俗尚詭隨人言明哲流水泱泱高  
山巒巒凡百君子視茲豐碣



